



## **MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DO MEDIO RURAL E A UNIVERSIDADE DE SANTIAGO DE COMPOSTELA PARA ELABORACIÓN DA PROPOSTA DO PLAN ESTRATÉXICO DA PAC (POLÍTICA AGRARIA COMÚN) EN GALICIA HORIZONTE 2030, COFINANCIADO PARCIALMENTE CO FONDO EUROPEO AGRÍCOLA DE DESENVOLVEMENTO RURAL (FEADER) NO MARCO DO PDR DE GALICIA 2014-2020**

(1) A Consellería do Medio Rural é a encargada de propor e executar as directrices xerais do Goberno no ámbito rural, que engloba as competencias en materia de agricultura, gandería, desenvolvemento rural e ordenación comarcal, estruturas rurais, industrias alimentarias, montes, prevención e defensa dos incendios forestais, de acordo co establecido no Estatuto de Autonomía de Galicia e segundo os termos sinalados pola Constitución española.

O Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, dispón que á Consellería do Medio Rural lle corresponde a elaboración, a proposta e o desenvolvemento das directrices de política agraria en materia de ordenación, fomento e mellora da produción agrogandeira, e executar, entre outras, as medidas de apoio ao sector lácteo e gandeiro de Galicia, así como a formación, promoción e fomento do asociacionismo agrogandeiro.

No mesmo sentido, correspóndelle tamén a elaboración, a proposta e o desenvolvemento das directrices da política agraria en materia de mellora da estrutura das explotacións agrarias, a ordenación do sector agroindustrial e o fomento da súa actividade de transformación.

### **(2) Antecedentes**

A Comisión Europea presentou, en xuño do 2018, as propostas lexislativas para a nova PAC que deberá aplicarse no período 2021-2027. Estas propostas establecen un novo modelo de aplicación da política agraria comunitaria, segundo se recolle na Proposta de Regulamento do Parlamento Europeo e do Consello polo que se establecen normas en relación coa axuda aos plans estratéxicos que deben elaborar os Estados membros no marco da política agrícola común (plans estratéxicos da PAC), financiada con cargo ao Fondo Europeo Agrícola de Garantía (FEAGA) e ao Fondo Europeo Agrícola de Desenvolvemento Rural (Feader), é a elaboración en cada Estado membro do denominado Plan Estratéxico da PAC.

Este Plan pretende ser un exercicio de reflexión estratéxica, no que se defina a visión da agricultura e do medio rural do futuro en Galicia, deseñando sobre esa base a aplicación das propostas normativas da PAC e tamén, no seu caso, doutras políticas.

A diagnose, a avaliación das necesidades e as liñas de acción establecidas neste Plan debe integrar tanto as diversas medidas da política agraria comunitaria como outras políticas





nacionais e rexionais, tendo como finalidade última o avance nuns obxectivos socioeconómicos e ambientais adaptados a nosa comunidade autónoma consensuados entre os diferentes niveis institucionais (europeo, nacional e rexional).

Neste contexto é necesario coñecer a situación de contexto do rural galego, a elaboración dunha análise DAFO, a avaliación das necesidades e o deseño da estratexia de intervención no medio rural galego.

### (3) Finalidade

Para os efectos sinalados tense previsto formalizar un convenio de colaboración entre a Consellería do Medio Rural e a Universidade de Santiago de Compostela que entrará en vigor o día da súa sinatura e manterá a súa vixencia ata o 31 de outubro de 2020, podendo prorrogarse por un ano máis, ata o 31 de outubro de 2021, por acordo mutuo das partes antes da súa finalización para o cumprimento da finalidade nel establecida.

(4) O convenio ten por obxecto regular o marco de colaboración entre as institucións asinantes para a elaboración da proposta do Plan Estratéxico da PAC para Galicia Horizonte 2030 e que a Comunidade Autónoma de Galicia teña unha participación activa nas diferentes fases do proceso de elaboración do Plan Estratéxico Nacional da PAC 2021-2027, coordinado en España polo Ministerio de Agricultura, Pesca y Alimentación (MAPA).

(5) O instrumento convencional que se pretende asinar fundaméntase no seguinte:

A USC é unha entidade de dereito público que desenvolve actividades de formación, investigación e desenvolvemento científico e tecnolóxico, sendo o desenvolvemento sustentable de Galicia un dos obxectivos aos que tales actividades se deben.

A USC é a única entidade española implicada na xestión do Service point da European Innovation Partnership 'Sustainable and productive agriculture', estrutura que busca conectar políticas e recursos a nivel da UE, nacional, rexional e local para acelerar el desenvolvemento de solucións e, en consecuencia, cun elevado valor consultivo para a na nova reforma da PAC.

Ademais, o Campus Terra en Lugo é o Campus de especialización da USC está centrado e comprometido cos ámbitos de actuación do sector primario e do entorno rural, estando presente na formulación de estratexias, programas, plans e regulacións concernentes ao ámbito rural en distintos eidos (medioambiental, desenvolvemento rural, ordenación territorial e xestión de terras, etc.), así como á súa posta en funcionamento, seguimento e avaliación.

A Consellería vén de crear un Grupo interno de Traballo para a elaboración da proposta de Plan Estratéxico da PAC para Galicia Horizonte 2030 que ao mesmo tempo fundamente a contribución de Galicia ao Plan Estratéxico de España.

A colaboración entre a Consellería do Medio Rural e a USC vai permitir efectuar unha análise e diagnose sobre a situación actual do medio rural galego e en particular do sector agrario, identificar e priorizar as súas principais necesidades e, sobre esa base, deseñar





finalmente unha proposta de estratexia de intervención a dez anos. Todo iso contribuirá a que a Comunidade Autónoma de Galicia participe activamente nas diferentes fases do proceso de elaboración do Plan Estratéxico da PAC, que en España está coordinando o Ministerio de Agricultura, Pesca y Alimentación (MAPA).

(6) Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fora do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE y 2014/24/UE, do 26 de febreiro de 2014, con independencia de que, de acordo co previsto no artigo 4 da devandita norma, lle sexan de aplicación os principios desta Lei para resolver as dúbidas e lagoas que puidesen presentarse.

Para a tramitación deste convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela, 19 de setembro de 2019

O subdirector xeral de Planificación e Coordinación de Fondos

(asinado dixitalmente)

Juan Manuel Martínez Barral

